

**CRITERIOS DE AVALIACIÓN DA PRODUCCIÓN DE TRANSFERENCIA
APLICABLES AOS MÉRITOS CORRESPONDENTES AO ANO 2015
(Aprobados en Consello de Goberno de 22 de xullo de 2016)**

Nos últimos anos vimos observando unha clara tendencia á valorización da transferencia de coñecemento, como vía de progreso da sociedade. Isto queda reflectido, tanto no ámbito estatal como autonómico, no eido legislativo e nos sucesivos Plans de Investigación, Desenvolvemento e Innovación. Por exemplo, a Lei 14/2011, de 1 de xuño, da Ciencia, a Tecnoloxía e a Innovación, fai énfase na importancia da transferencia, con comentarios como “O esforzo realizado por España nas dúas últimas décadas por situar a súa ciencia a nivel internacional debe complementarse agora cunha maior énfase na investigación técnica e o desenvolvemento tecnolóxico e na transferencia dos resultados de investigación cara ao tecido produtivo”, ou incluíndo novos conceptos como a “transferencia inversa do coñecemento” liderada polo sector empresarial en colaboración cos axentes de investigación. Pola súa banda, tamén a Xunta de Galicia aposta pola transferencia a través do seu Plan I2C de Investigación, Innovación e Crecemento do ano 2010 no que busca desenvolver un ecosistema de investigación e innovación suficientemente eficiente como para situar a economía galega en posición de competir nunha contorna global.

A transferencia de coñecemento preséntase polo tanto como un dos eidos fundamentais da actividade na Universidade, e a súa axeitada avaliación pode ser unha ferramenta para a súa incentivación e a definición e fortalecemento das liñas estratéxicas das institucións. A nosa universidade foi unha das primeiras do estado na avaliación específica dos méritos relacionados coa transferencia de coñecemento do seu persoal investigador.

A Universidade de Vigo formula a avaliación das actividades investigadoras de cada membro mediante dous tipos de indicadores, complementarios entre eles: por una banda, a produción de investigación e por outra a produción de transferencia. Nos dous conxuntos de criterios primarase a calidade, establecéndose políticas específicas para reforzar as actividades investigadoras e de transferencia.

Os criterios de avaliación da produción de transferencia aquí presentados teñen como obxectivo valorizar, visibilizar e potenciar a actividade do persoal investigador da Universidade de Vigo neste eido. Preténdese que o proceso avaliador sexa o mais sinxelo estandarizado e transparente posible, considerando os elementos máis significativos da actividade de transferencia dende unha perspectiva de calidade e excelencia, e tendo en conta as particularidades dos diversos ámbitos de coñecemento.

Tenderase así mesmo a unha máxima transparencia no proceso de avaliación, garantindo a posibilidade de que os investigadores e investigadoras coñezan a valoración da súa produción, e poidan presentar as correspondentes reclamacións se fose necesario.

CRITERIOS XERAIS

- A) Avaliaranse os méritos correspondentes ao ano 2015.
- B) Os méritos avaliaranse sempre que no documento acreditativo figure expresamente que a autora ou autor é da Universidade de Vigo, salvo que nese período non se incorporase a esta. Poderase ter en conta outra documentación acreditativa (p.ex. artigos de prensa), na que se indique expresamente e se faga visible a relación entre o mérito, os autores e/ou autoras do mesmo e a súa vinculación coa Universidade de Vigo.
- C) Avaliaranse méritos en distintos soportes (papel, electrónico, etc.) sempre que estes cumpran os criterios que se requiren para o seu recoñecemento.
- D) Non se considerarán aqueles méritos dos que a documentación sexa insuficiente, confusa ou recibida fora de prazo.
- E) Só se avaliarán os méritos daquelas persoas que sexan membros da Universidade de Vigo no momento da solicitude.

Poderán solicitar a avaliación da produción de transferencia: o profesorado fixo de cadro de persoal (catedráticos/as e titulares de universidade, catedráticos/as e titulares de escola universitaria, profesores/as contratados/as doutores/as, profesorado emérito), persoal investigador posdoutoral contratado con cargo a programas competitivos (Ramón y Cajal, Juan de la Cierva, posdoutorais da Xunta de Galicia, Marie Curie), profesorado axudante, profesorado asociado, lectores/as e estudantes de doutoramento vinculados a un grupo de investigación da Universidade de Vigo.

Non se considerarán, para os efectos de solicitude de avaliación da produción de transferencia: o profesorado de listas de agarda, o profesorado invitado ou visitante e o persoal investigador contratado con cargo a proxectos que non estea cursando estudos de doutoramento na Universidade de Vigo.

- F) Os puntos asignados a cada mérito dividiranse entre o número total de autoras/es, e asignarase a cada investigadora ou investigador da Universidade de Vigo o que lle corresponda.

Se o número de autores/as da Universidade de Vigo, é igual ou superior a un terzo do número total de autores/as, computarase o traballo como realizado na súa totalidade por autores/as da Universidade de Vigo, e dividirase a puntuación total do mérito entre estes.

- G) Os traballos asinados por varios autoras e/ou autores que pertencen a distintos departamentos deberán ser solicitados por cada un dos departamentos implicados. O mérito será avaliado unha soa vez, e os puntos totais correspondentes ao mesmo serán repartidos de xeito proporcional entre todos os autoras e/ou autores.
- H) Non se poderá presentar un mesmo mérito en dous apartados distintos. Cando un mérito de transferencia sexa presentado nun apartado que non corresponda, non será valorado.
- I) Non será preciso que o departamento entregue aquela documentación que teña avaliación automática (apartados A, B, C e D.1), agás que se solicite expresamente. Nembargante, deberá enviar á Vicerreitoría a documentación xustificativa dos méritos que non teñen avaliación automática (apartados D.2, E, F, G, H e I).

A Vicerreitoría de Investigación e Transferencia levará a cabo unha comprobación por mostraxe da veracidade dos datos rexistrados. Para ese efecto poderá solicitar dos departamentos, no momento que considere oportuno, a xustificación correspondente a todos ou algúns dos méritos rexistrados, establecéndose un prazo para que os anteditos departamentos preparen e envíen, se procede, a referida documentación. En todo caso, unha vez avaliada a produción de transferencia, a documentación requirida será devolta integramente ao departamento.

Realizada a verificación, en caso de detectarse o rexistro de méritos non avaliados segundo os presentes criterios, ou méritos para os cales non exista a documentación xustificativa completa, a Vicerreitoría de Investigación e Transferencia procederá a anular os méritos correspondentes, e a deducir ao persoal investigador implicado o 300% da puntuación que lle correspondería por cada ítem afectado na Produción de Transferencia do mesmo ano, se os prazos marcados no procedemento o permiten, ou do ano seguinte en caso contrario.

- J) Os departamentos serán responsables de verificar a documentación acreditativa dos méritos presentados polos seus membros, e proceder á validación na aplicación informática soamente no caso que o mérito sexa evaluable segundo o indicado nos presentes criterios, e a documentación acreditativa sexa correcta. Non se avaliará ningún mérito que non fora validado polo departamento durante o prazo establecido para tal fin. A relación definitiva dos méritos solicitados deberá contar co visto e prace do Consello de Departamento.
- K) A Comisión de Investigación, delegada de Consello de Goberno, realizará a avaliación dos distintos méritos presentados, para o cal poderá solicitar o asesoramento que estime conveniente. Así mesmo, velará porque non se produzan duplicacións de méritos, e resolverá as dúbidas ou fará as aclaracións que sexan necesarias.

CRITERIOS ESPECÍFICOS

<i>Índices de PRODUCCIÓN DE TRANSFERENCIA</i>	<i>Puntos Max.</i>
A. Proxectos, colaboracións e convenios con empresas:	Nota A
A.1. Importe das actividades contratadas de I+D (contratos, informes/ditámenes e cursos) con empresas e institucións.	15
A.2. Importe de proxectos de I+D competitivos:	
A.2.1. INTERNACIONAIS.	20
A.2.2. NACIONAIS.	18
A.2.3. AUTONOMICOS.	15
B. Contratos de licenza:	
B.1. Importe anual ingresado dos contratos de licenza.	25
C. Propiedade Industrial:	Nota C
C.1. Nº de Patentes concedidas.	
C.1.1 Nacionais (nas bases de datos da OEPM -Oficina Española de Patentes y Marcas-).	
C.1.1.1. Sen explotar.	3
C.1.1.2. En explotación.	10
C.1.2. Internacionais PCT (nas bases de datos da EPO -European Patent Office-)	
C.1.2.1. Sen explotar.	5
C.1.2.2. En explotación.	15
C.2. Nº de Modelos de Utilidade concedidos.	
C.2.1. Sen explotar.	1
C.2.2. En explotación.	3
D. Creación de Empresas de Base Tecnolóxica (EBT's):	Nota D
D.1. Nº de empresas creadas.	20
D.2. Importe da facturación anual.	0,5
E. Resultados da creación artística:	Nota E
E.1. Producción Artística. Obras e realizacións artísticas. Proxectos artísticos. Procesos artísticos. Innovación en medios e instrumentos artísticos. Documento-creación. Comisariado. Proxectos interdisciplinais.	15
E.2. Producción Audiovisual. Producción e creación. Organización de festivais e concursos. Medios de distribución de material audiovisual.	15
E.3. Deseño. Produtos de consumo e equipamento profesional. Ambientes. Museográfico e expositivo. Escenográfico. Gráfico. Mobiliario e materiais de decoración. Packaging. Moda e Têxtil. Videoxogos. Comisariado en deseño.	15

F. Creación Literaria:	Nota F
F.1. Competitiva.	
F.1.1. Concurso internacional competitivo.	
F.1.1.1. Primeiro premio.	15
F.1.1.2. Outros premios e Accésits.	5
F.1.2. Concurso nacional competitivo.	
F.1.2.1. Primeiro premio.	9
F.1.2.2. Outros premios e Accésits.	3
F.1.3. Outros concursos.	
F.1.3.1. Primeiro premio.	2
F.1.3.2. Outros premios e Accésits.	1
F.2. Non Competitiva.	2
F.3. Elaboración de dicionarios (dicionarios completos, entradas).	10
G. Software Libre e Open Source:	Nota G
G.1. Liberación de software posto a disposición da comunidade científica mediante repositorios públicos recoñecidos (SourceForge, GoogleCode, etc.), e avaliado por unha publicación científica asociada.	5
H. Actividades promocionais	
H.1. Presenza en feiras.	
H.1.1. Internacionais.	5
H.1.2. Nacionais.	2
H.2. Realización de xornadas universidade empresa.	3
H.3. Elaboración de material promocional sobre a oferta de I+D+i: catálogos, folletos.	2
I. Actividades de Transferencia Social, cultural e educativa	Nota I
I.1. Organización de congresos, xornadas, seminarios, conferencias ou cursos de formación destinados a persoas externas á Universidade de Vigo.	5
I.2. Actividades non lucrativas de carácter representativo ou de asesoramento para persoas físicas ou xurídicas e institucións distintas á Universidade de Vigo (elaboración de informes xurídico técnicos, pertenza a consellos de organismos públicos, presidencias de convenios colectivos, arbitraje en eleccións sindicais, etc.).	5
I.3. Elaboración de Publicacións de divulgación Científica Educativa.	5
I.4. Participación en comités de estandarización, coautoría o coedición de normas, estándares ou especificacións técnicas.	5
I.5. Recensións.	5
I.6. Tradución de libros técnicos ou literarios.	5

Nota A) A suma total do ingreso en cada apartado dividirase entre 50.000 euros, e o número resultante multiplicarase polos puntos asignados. O investigador ou investigadora principal/responsable con dereito a valoración será quen figure como tal na memoria do proxecto/contrato asinado. As cantidades sempre se refiren ao ingresado pola Universidade de Vigo. Para acadar puntuación en cada un destes apartados, a suma total do ingreso en cada un deles deberá superar un mínimo de 10.000 euros. Se computará a cantidade total do proxecto/contrato no ano da resolución definitiva/sinatura.

Nota C) Como documentación achegarase copia da aceptación da Patente ou Modelo de Utilidade e/ou xustificante da aceptación e/ou explotación, así como xustificantes da tramitación a través da Universidade de Vigo. Considerarase como data de referencia a data de aprobación pola OEPM (Oficina Española de Patentes y Marcas). Non se considerarán mentres estean en trámite.

Nota D) So se valorarán aquelas EBT's institucionalizadas que contén co preceptivo Contrato de Transferencia Tecnolóxica e que teñan aceptado poder ser participadas pola Universidade de Vigo. Deberase certificar notarialmente a participación de cada investigador ou investigadora na empresa.

A valoración do importe facturado polas empresas de base tecnolóxica calcularase dividindo a facturación total anual da empresa entre 50.000 euros. O resultado desta división multiplicarase polos puntos asignados na táboa. Só se valorará a facturación naquelas actividades que figuren no Contrato de Transferencia Tecnolóxica.

Nota E) Os méritos relacionados coa creación artística valorarase ata a puntuación máxima indicada na táboa en función dos seguintes indicios de calidade:

- a) Ámbito (local, provincial, rexional, estatal ou internacional)
- b) Documento xerado.
- c) Premio e adquisicións.
- d) Canal de difusión.
- e) Concursos, adxudicación e patrocinio.

Haberá que presentar evidencia da obra.

Nota F) A creación literaria NON COMPETITIVA valorará traballos creativos no ámbito da literatura realizados por invitación dalgunha entidade ou medio de comunicación. A achega valorarase ata a puntuación máxima indicada na táboa en caso de ser o autor da obra, no caso das colaboracións na autoría valorarase con a metade de puntos.

No caso dos premios, a lingua de publicación non será considerada como factor determinante do ámbito no que se encadren.

Na avaliación de autoría de dicionarios, distinguirase entre a autoría de dicionarios completos e a de entradas, e teranse en conta tanto a calidade e repercusión da obra como o número e extensión das entradas, se procede.

Nota I) A nota máxima total que se pode obter neste apartado completo será de 20 puntos.

Para valorar os méritos do apartado *I.1- Organización de congresos, xornadas, seminarios, conferencias ou cursos de formación destinados a persoas externas á Universidade de Vigo* debe constar que o investigador levou a cabo tarefas de coordinación ou organización, **nunca se**

valora como mérito de Producción de Transferencia a participación como poñente, docente, coordinador de mesas de debate e similares.

No apartado *1.2-Actividades non lucrativas de carácter representativo ou de asesoramento para persoas físicas ou xurídicas e institucións distintas á Universidade de Vigo* unicamente se valoran informes non remunerados, o investigador debe acreditar que esta actividade de representación non ten carácter lucrativo. **Non se valorarán aquelas accións que poden estar incluídas dentro das obrigas que leva o cargo de representación que ostenta o solicitante.**

No apartado *1.3-Elaboración de publicacións de divulgación científica educativa* haberá que ter en conta que os libros de texto non se consideran como divulgación, se non como docencia, polo que non se valoran. Ademais, os artigos en prensa non se valorarán se non figura mención á Universidade de Vigo, e as entrevistas en calquera medio de comunicación (prensa, radio, televisión, etc.) non serán valoradas en ningún caso.

No apartado *1.4- Participación en comités de estandarización, coautoría o coedición de normas, estándares ou especificacións técnicas* valorarase con un punto cando soamente demostre a pertenza a ese comité, para acadar a puntuación máxima haberá que especificar claramente que actividade leva a cabo o investigador en dito comité.

No apartado *1.5- Recensións* valóranse soamente as recensións realizadas, non as recibidas. Asemade as recensións de artigos non se valoran posto que foron tidas en conta na produción de investigación.